

NOTICIA DI
GOBIERNO

ISLA((•))NLINE

20
22

Diamars 14 Juni 2022

Email: IslaOnline@gobierno.aw Tel: 528-4952



Gabinete Wever - Croes II

2022

**AÑA DI INVERSION
Y OPORTUNIDAD**



En conexion cu Dia Mundial di Donante di Sanger

PROME MINISTER A BISHITA BLOEDBANK

Y TA HACI APELACION PA MAS CIUDADANO

BIRA DONANTE

“Danki na e 1500 donante actual cu merece elogio pasobra nan ta salba bida”



14 di juni ta Dia Mundial di Donante di Sanger. World Health Organisation (Organisacion Mundial di Salud) a instutui e dia special aki na 2004 dedica na donante di sanger cu e obhetivo pa crea conscientisacion riba e importancia y necesidad grandi pa duna sanger. E slogan di e aña aki ta “Duna sanger ta un acto di solidaridad. Afilia bo mes na e esfuerzo y salba bida”.

Prome Minister Evelyn Wever-Croes diamars mainta a haci bishita na Bloedbank especialmente pa gradici e trahadonan

como tambe tur donante di sanger. Bloedbank ta un entidad sumamente profesional cu trahadonan cu ta haci nan trabou cu hopi entusiasmo.

Durante su bishita, Prome Minister a haya un rondleiding na unda cu el a keda impresiona no solamente cu e facilidad y ekipo, pero tambe cu e profesionalismo y positivismo cu ta reina den e trahadonan. Prome Minister den su palabranan dirigi na e ocasion, a gradici trahadonan di bloedbank pa e bunita trabou cu nan ta haci den yuda salba bida.

Continuacion PROME MINISTER A BISHITA BLOEDBANK....

Prome Minister a remarca cu tin necesidad grandi na Aruba pa haya mas donante. Un urgencia pa mas ciudadano bira donante di sanger. Na Aruba tin mas o menos 1.500 donante so di sanger. Sinembargo tin mas o menos 2500 pa 3000 persona cu mester di haya un transfusion di sanger na Aruba. Esaki claramente ta un indicacion cu no tin suficiente donante di sanger pa e cantidad di persona cu tin mester di sanger sea pa motibo di malesa, accidente of operacion.

“P’esey awe, mi kier haci un apelacion na henter e comunidad di Aruba pa nos cada un averigua pa mira si nos por bira donante. E deseo ta pa redobla e cantidad di donante. 1500 donante actual merece elogio pasobra nan ta salba bida y ta wordo yama mas di un biaha pa aña pa duna sanger. Danki na cada un di boso. Pero, ki ubo si cada ciudadano cu por duna sanger, duna di su parti y sea parti di esnan cu ta salba bida. Nunca nos sa bida di ken nos ta salba, pero e por ta di un ser stima”, Prome Minister a expresa.

Prome Minister a haci un apelacion tambe na doñonan di trabou pa stimula trahadonan pa duna sanger y duna nan e espacio tambe pa acudi na Bloedbank pa duna sanger. Ya caba algun ta haciendo esaki cu ta di hopi aprecia.

“Den e tempo aki di recuperacion, ban ta mas voluntario y duna mas na nos pais y hiba nos pais padilanti. Desde 18 aña bay ariba, bo por ta un donante. Acudi na Stichting Bloedbanki pa haci e procedura pa bira donante y sea parti di esnan cu ta salba bida”, Prome Minister a enfatisa.





UN PASO MAS PA E PROYECTO 'MANTENIENDO HERENCIA BIBO DEN TEMPO' DEN COMPLEHO ECURY

Un inversion importante na bienestar di cultura di Aruba



E etapa concerni ta encera mantencion grandi y adaptacion di tres edificio monumental cu ta forma e fachada di MANA (Museo Arqueologico Nacional Aruba). Ta trata di Cas Dundun, un hoyo di edificio cu ta icono pa Playa. Tambe e Cas di Cunucu y Fruteria lo conoce un bachi nobo. Tur esaki danki na un aporte financiero riba 1 miyon florin financia pa UNOCA y Ministerio di Cultura. Un inversion importante na bienestar di cultura di Aruba.

Banda di e trabou di mantencion, MANA hunto cu curador Heronimo ta desaroya dos exposicion nobo. Un lo enfoca riba e contribucion di famia Ecury den desaroyo di Playa y Aruba. E otro lo enfoca riba balornan significativo durante e diferente epocanan di Aruba. Parti di e exposicionnan nobo lo ta documentarionan audio visual bou encargo di Rebecca Roos Productions. Meta ta pa tur e trabounan aki keda cla den prome mitar di 2023.

Cu e inversion aki MANA ta duna contenido na e definicion nobo di museo cu UNESCO ta promoviendo. Museo como aliado den desaroyo di comunidad y un agente social y di cambio. Banda di investigacion cientifico, y educacion continuo MANA



ta fortifica su contribucion na experiencia turistico unico. Minister Maduro ta gradici e ekipo di MANA, curador Heronimo, Oficina di Monumento, UNOCA, Van Kessel y Ace Firm Engineering pa hunto haci posibel pa por cuminsa cu e trabounan di mantencion. Minister Maduro ta confia riba bon boluntad di tur involvi pa logra e gran meta di Mantene nos Herencia Cultural bibo.

DEPARTAMENTO DI IMPUESTO A PERCURA PA PAGA 8.7 MIYON FLORIN NA RESTITUCION DI IMPUESTO DEN PROME KWARTAAL DI AÑA 2022

Mientrastanto a cuminsa traha riba inkomstenbelasting di año 2020



E trabounan na Departamento di Impuesto ta avansando cu pasonan firme y sigur, pa asina por cumpli cu tur e contribuyentenan cu ta cumpliendo debidamente cu nan asuntonan di impuesto. Den e prome kwartaal di año 2022, a paga un total di 8.7 milyon florin como pago di restitucion na e contribuyentenan cu a paga impuesto di mas.

Restitucion den prome kwartaal di año 2022

Den e prome 3 lunanan di año 2022, tawatin 5.163 caso di restitucion cu a keda realisa, pa cual a paga en total 8.7 milyon florin. E pagonan di restitucion ta toca diferente año, pero e sumanan mas grandi di pagonan haci ta relaciona cu inkomstenbelasting di e añanan 2017, 2018 y 2019.

Aki ta sigui un bista di e pagonan di restitucion di impuesto den e prome kwartaal di año 2022.

Inkomstenbelasting di año 2020

Mientrastanto Departamento di Impuesto a cuminsa saca e cobransanan definitivo di inkomstenbelasting di año 2020. Pues e contribuyentenan por conta cu den e lunanan venidero nan lo haya nan “definitieve aanslag” di año 2020 via post. Esnan cu ta sperando un suma di restitucion y no tin debe di otro impuesto nan habri, por spera tambe nan placa riba nan cuenta di banco. P’esey ta hopi importante pa percura pa tur debe di impuesto y e informacion di cuenta di banco ta na ordo. Si tin cambio di banco y/of di cuenta, ta recomendabel pa notifica e departamento mesora. Esaki por sosode solamente online via

www.impuesto.aw/bankrekeningnummer.

Pa loke ta e cobransanan di año 2021, ta planea pa cuminsa cu esakinan den di dos mita di año 2022. Eliminando asina e constante atraso cu e departamento tawatin e ultimo decadan.

	Cantidad di contribuyente	Suma di restitucion paga
Januari 2022	1.913	3.2 milyon
Februari 2022	1.730	2.7 milyon
Maart 2022	1.520	2.8 milyon
Total	5.163	8.7 milyon

Cumpliendo cu su contribuyentenan

Como un organisacion di gobierno serio y responsabel, Departamento di Impuesto tin como meta pa cumpli cu su contribuyentenan. E contribuyentenan cu a percura pa nan declaracion di inkomstenbelasting wordo entrega na tempo, cu tin gastonan deducibel y cu a paga pues di mas na impuesto, tin derecho riba pago di restitucion si acaso no tin otro debenan di impuesto habri. Esaki ta mas cu un deber pa e departamento.

E tin un prioridad halto. P’esey tambe Departamento di Impuesto a implementa diferente plan di accion pa por elimina e atrasonan den e cobransanan aki y e obhecionnan cu tin pendiente. Ta trata principalmente di atrasonan den inkomstenbelasting caminda a logra elimina esakinan den un forma structura y cu un empeño grandi di su funcionarionan publico.

E contribuyentenan por conta cu Departamento di Impuesto no ta para keto y ta keda mehora y digitalisa su procesonan, pa asina ta mucho mas eficiente y eficaz.



E PRESTACION DI HOTELNAN DEN LUNA DI MEI 2022 TABATA BON

Turismo di Aruba ta pasando den e mihor momentonan di su recuperacion. Minister di Turismo y Salud Publico sr. Dangui Oduber ta sumamamente contento y satisfecho cu e resultadonan di luna di mei 2022. Recientemente AHATA a publica su cifranan tocante e prestacion di e hotelnan y Minister Oduber tin e placer di por comparti esakinan cu pueblo. E cifranan aki ta ilustra e comparacion entre mei di 2019 y mei 2022. E cifranan cu a ser ricibi pa cu luna di mei 2022 ta muestra hopi bon.

Manera ta conoci e maneho di Minister Oduber ta dirigi riba turistanan di calidad y turistanan cu ta gana mas di 150 mil dollar pa aña, turistanan cu ta laga hopi placa atras den nos economia.

Den luna di mei 2022 e grado di ocupacion a subi cu 40% por ciento compara cu mei 2021. Si compara esaki cu e grado di ocupacion di aña 2019 cu ta un aña record pa Aruba su turismo, e ta solamente 3% menos. Segun e mandatario ta importante pa remarca cu Aruba ta e di 2 pais na mundo cu a recupera su turismo di e forma aki.

Banda di e grado di ocupacion e REV PAR den luna di mei 2022 a conoce un crecimiento di 57.4% den comparacion cu luna di mei 2021 y cresemento di 12.7% den comparacion cu mei 2019. E REV PAR den mei 2022 tabata \$205.61 cu ta un cifra impresionante. E REV PAR ta un indicador sumamente importante pa midi e calidad di turistanan cu ta bin Aruba. E REV PAR ta e prijs cu un turista ta dispuesto pa paga pa un camber pa anochi. Nos como pais mester ta contento cu e hecho cu nos tin un di e REV PAR mas halto den Caribe. Na momento cu bo tin un REV PAR asina halto e ta bisto cu turistanan di calidad ta yegando nos pais.

Otro indicador hopi importante ta e ADR (average daily rate) cu tambe a conoce un aumento di 16.4%. E average daily rate den luna di mei 2022 ta \$262.20 den comparacion cu mei 2019 cu esaki tabata na \$225.21.

Turismo ta keda e driver principal di nos economia, resultadonan di luna di mei ta confirma cu recuperacion di Aruba su Turismo ta riba e bon caminda. Maneho di Minister Dangui Oduber ta dunando e resultado conforme e vision di atrae turistanan di calidad y esaki a wordo confirma cu cifranan di AHATA. Esaki sigur ta un noticia hopi positivo. Finalmente e mandatario a gradici tur empleadonan y tur partnernan den sector turistico pa cu e resultado bunita aki.

May 2022 vs 2019

AHATA Hotel Performance

May	2022	2019	% change
Rooms	5,271	4,912	7.3%
ARN	162,093	152,275	6.4%
ORN	127,107	123,368	3.0%
OCC	78.4%	81.0%	-3.2%
ADR	\$262.20	\$225.21	16.4%
RevPAR	\$205.61	\$182.46	12.7%



"E IMPORTANCIA DI IGUALDAD"



Den e luna di juni mundo ta para keto na e importancia di igualdad. Un desaroyo sostenibel ta aspira pa crecemento economico den harmonia cu calidad di bida di nos hendenan y proteccion di nos naturalesa. Como Minister encarga cu Desaroyo Sostenibel y realisacion di e Sustainable Development Goals (SDG's) di e Agenda 2030 di Nacionnan Uni, Minister Wever ta enfatisa e importancia di igualdad di genero y reduccion di desigualdad. Esaki ta conta especificamente pa meta 10.2 pa empodera y promove inclusion social, economico y politico di tur, a pesar di edad, sexo, discapacidad, rasa, etnicidad, origen, religion, estado economico of otro estado y e principio di 'leave no one behind'. Den e vision di maneho di Minister Wever a pone atencion specifico na e tema di reduccion di desigualdad.

Derechonan humano manera e derecho riba igualdad ta wordo stipula den nos Constitucion y den tratadonan internacional manera e Convencion Europeo di Derechonan Humano (EVRM). EVRM ta proteha tambe e derecho riba un bida familiar ('family life') no obstante e preferencia sexual.

Na aña 2015 Corte Europeo pa Derechonan Humano a stipula cu den caso cu un pais no ta brinda oportunidad pa parehanan di mesun sexo drenta enlace matrimonial, e pais tin e obligacion pa brinda e personanan aki un alternativa pa por registra nan relacion pa medio di un forma di un union civil, cu lo mester brindanan por lo menos e derechonan basico ('core rights') pa proteha nan relacion. Pais Aruba a cumpli cu e obligacion aki pa medio di nosCodigo Civil cu a drenta na vigor na luna di september aña pasa. Desde e tempo ey ta posibel pa parehanan di e mesun y di diferente sexo efectua un union civil ('geregistreerd partnerschap').

Sinembargo tin cambionan legal cu mester tuma lugar ainda pa por papia di igualdad completo entre parehanan cu a efectua un union civil y parehanan casa na Aruba. E hecho cu a regla solamente e 'core rights' ta significa cu e derechonan cu un matrimonio ta ofrece na parehanan casa riba por ehempel tereno fiscal, di pensioen, di herencia pero tambe di relacionnan di famia, no ta conta pa parehanan cu a efectua un union civil.

Pa reduci e desigualdad aki y pa promove e inclusion di diferente (grupo di) personanan den sociedad, ta importante pa e posicion huridico di parehanan den un union civil wordo regula mas tanto cu ta posibel di e mesun forma cu esun di e parehanan casa. Despues di a regla pues e 'core rights' pa parehanan cu tin un union civil, ta toca turno pa regla e consecuencianan legal di esaki den forma di derechonan complementario ('supplementary rights'). Pa por haci esaki Minister Wever a pidi Consejo di Minister pa aproba pa haci un inventarisacion di e cambionan di nosCodigo Civil cu mester tuma lugar pa reduci desigualdad na Aruba, cual peticion a wordo aproba den mei 2022.

"Como Minister encarga cu Desaroyo Sostenibel mi ta kere den igualdad pa tur ciudadano di Aruba y cu niun hende mag keda atras. Como Pais nos mester percura pa nos cumpli cu tratadonan internacional y garantisa derechonan humano" – Minister Geoffrey Wever.



MINISTER ENDY CROES Y MASCOTA DI WEGANAN ESCOLAR 2022 WE WE A BISHITA MON PLAISIR BASISSCHOOL

Pueblo di Aruba ta cordialmente invita pa e gran apertura 17 juni proximo



Dialuna den ora tempran di mainta Minister Endy a compañía WEWE, e mascota di Weganan Escolar pa un bishita di cortesía na Mon Plaisir Basisschool en conexión cu WE 2022 cu ta cuminsa diabierna awo. Falta algun día pa Weganan Escolar 2022 inicia unda cu mas di 1200 mucha di binti diferente scol ta participa den ocho diferente disciplina for di 17 pa 25 di juni. E muchanan a keda encanta cu WEWE. Tur e docentenan a bisti awe mainta un uniform di un of otro deporte manera; karate, tennis, basket pa nombra algun. WEWE a invita e alumnonan y nan mayornan pa e gran apertura di Weganan Escolar cu ta tuma luga diabierna awo cuminsando pa 6'or di atardi den Compleho Deportivo Guillermo Prospero Trinidad na Dakota. Masha danki na e docente y alumnonan di Mon Plaisir School pa e bunita mainta. 4D

Ministerio di Enseñansa y Deporte y IBISA ta invita pueblo di Aruba pa e gran apertura di Weganan Escolar cu ta tuma luga diabierna awo dia 17 di juni, 2022 cuminsando pa 6'or



di atardi den Compleho Deportivo Guillermo Prospero Trinidad na Dakota. Directamente for di Italia Denzel Dumfries, ken ta haci apertura y asina duna inicio na e Weganan Escolar 2022. Ban apoya nos muchanan y disfruta di un mahestuoso show di apertura.



WEGANAN ESCOLAR

SCHEDULE

17 juni 2022	Kids Athletics - C.D. Guillermo P. Trinidad	4:00pm - 5:30pm
17 juni 2022	Opening Ceremony - C.D. Guillermo P. Trinidad	5:30pm - 8:00pm
18 juni 2022	Voetbal B-M - C.D. Guillermo P. Trinidad	9:00am - 11:00am
18 juni 2022	Badminton Categoria A-B-C - Colegio Arubano	1:00pm - 4:30pm
20 juni 2022	Basketbal B-J - Aruba Jrs.	2:30pm - 5:00pm
20 juni 2022	Competencia di Baile - Cas di Cultura	5:30pm - 9:30pm
21 juni 2022	Volleybal B-M/J - C.D.L. Betico Croes	2:30pm - 5:00pm
22 juni 2022	Dammen - IBISA	2:30pm - 5:00pm
22 juni 2022	Voetbal A-J - C.D. Guillermo P. Trinidad	2:30pm - 5:00pm
23 juni 2022	Voetbal B-J - C.D. Guillermo P. Trinidad	2:30pm - 5:00pm
23 juni 2022	Baseball 5 - C.D.L. Betico Croes	3:00pm - 7:00pm
24 juni 2022	Beach Tennis - Beach Tennis Aruba	2:30pm - 5:00pm
25 juni 2022	Kids/Youth Run - C.D. Guillermo P. Trinidad	6:00am - 10:00am
25 juni 2022	Closing Ceremony - C.D. Guillermo P. Trinidad	5:30pm - 8:00pm

BAN APOYA NOS MUCHANAN!

2022AÑA DI INVERSION
Y OPORTUNIDAD**ENFOCANDO
RIBA E
BIENESTAR
DI CADA FAMILIA**

MINISTER

Glenbert Croes

NOS TA TRAHANDO PA DESAROYA E AREA DI REFINERIA CU PROYECTONAN ENERGETICO



Tin diferente interesadonan nobo cu a expresa nan interes den e area di Refineria. E proceso aki ta andando y RDA a cuminsa cana e caminda di pre-screening di e companianan cu a expresa nan interes. Esaki ta inclui invitacion pa reunion. Pidi nan tur informacion, full disclosure di entre otro nan propuesta di Proyecto y e asina yama KYC– Know Your Client etc.

Di awor pa fin di luna varios grupo lo ta biniendo Aruba pa reunion cu e comite negociador y mi persona como Minister di Energia. Durante e reunion cada grupo lo mester presenta nan plannan definitivo elabora y detaya. E proceso aki lo termina fin di Juni.

Den luna di Juli e comite negociador di RDA lo haci nan evaluacion conforme e National Energy Policy y e meta di Gobierno di Aruba manera acorda pa MEP y RAIZ. Tambe lo evalua e credibilidad di cada grupo, nan capacidad y trayectoria. Lo evalua e vision di e propuesta. Y lo evalua e capacidad financiero verificabel.

Pa mas tarda Augustus ta premira y desea di por yega na un decision con ta bay desaroya e zona di Refineria.

Nos meta ta desaroya e zona di Refineria como un sector di Energia cu mester cumpli cu nos roadmap pa yega na e acuerdo di Paris pa aña 2050.

GREAT JOB OPPORTUNITIES PRESENTED DURING SUMMER JOB FAIR 2022

Working in hospitality is fun and rewarding. For those who are looking for an opportunity to work in a restaurant or bar, there is some fantastic news to share!

The Aruba Food & Beverage Association is organizing and hosting a Job Fair at the Renaissance Convention Center, on Monday, June 20th, 2022. The event will go from 11am till 8pm (no cover charge). It is the ultimate opportunity to start or boost your career. And there will be great door prizes too.

Under one roof you be able to find an elite selection of restaurants and bars in Aruba. The entrance is free, and the businesses will happily present their case to you. You will not find a better chance to find a job in this dynamic, successful, and pleasant industry.

The event is open for seasoned professionals who are looking for career growth, as well as for new talents in hospitality looking for a career in a restaurant or bar. It is also an ideal event for fresh graduates, who want to give wings to their dreams, or wish to sharpen their interviewing and company interaction skills to attend.

Expect many different restaurants and bars to be present and over 200 job vacancies to apply to. Simply visit, gather information and select the job that fits you best. It is the perfect way to learn about the open positions and to speak with the people who actually work there. Hear their stories and connect one-one-one.

So, Summer Job Fair is your opportunity to advance in life. For more information, visit jobfairaruba.com.

2022
JOB+FAIR
ARUBA FOOD & BEVERAGE ASSOCIATION

MONDAY, JUNE 20
11AM - 8PM

**@ RENAISSANCE
CONVENTION CENTER**

Hosted by:



Any Questions? Contact:
+297 566 1057 | info@fabaruba.com

WWW.JOBFAIRARUBA.COM



SDG Aruba ta haci un yamada na comunidad pa comparti cu nos: "CON BO INICIATIVA TA CONTRIBUI PA LOGRA E 17 METANAN PA UN DESAROYO SOSTENIBEL"

Comparti bo iniciativa cu Nacionnan Uni



Den september 2015, tur miembro di Nacionnan Uni (UN) unanimamente a adopta e programa internacional mas integral y ambicioso pa por crea un mundo mas sostenibel pa tur, creando 17 meta specific, Metanan Mundial pa Desarrollo Sostenibel (SDGs), pa logra un miho mundo cu nos tin awo pa 2030. Aruba tambe ta parti di e esfuerzo pa por logra e obhetivo aki. Pa crea un miho Aruba y uno mas sostenibel, nos kier scucha mas di e sector educacional, negoshinan y organisacionnan no gubernamental y departamentonan, con nan ta contribui na e metanan aki. Ta requeri e esfuerzo di tur pa logra e metanan.

E lista di "TO DO's" aki ta crea un agenda na unda cu e desarrollo no ta basa solamente riba e perspectiva economico pero tambe ta inclui aspectonan social y di medio ambiente. Pa por implementa un estructura efectivo di e Metanan Mundial pa Desarrollo Sostenibel (SDGs) y e agenda extenso pa 2030 y crea un Aruba miho y sostenibel, ta rekeri un comunidad comprometi y mas activo. Mas uni nos ta, mas y miho nos ta logra. Realizando cu no tur por wordo realisa pareu.

Pa sigui encurasha paisnan pa implementa e metanan aki, Nacionnan Uni a establece un proceso yama "SDG Voluntary National Review (VNR)" cu ta permiti paisnan reporta riba e implementacion di e metanan aki y pa esaki wordo revisa.

E proceso di revision door di miembronan, lo provee recomendacionnan riba con pa mehora e proceso di implementacion di e metanan aki riba nivel nacional.

Basa riba e revision, recomendacionnan ta wordo duna pa mehora e proceso di implementacion nacional di e metanan di Nacionnan Uni. Aruba lo ta inclui den e 'SDG VNR Report' di Reino Hulandes.

Riba 14 di juli 2022, tur pais den Reino Hulandes lo presenta na Nacionnan Uni e progreso cu nan a haci den implementacion di e SDGs y lo accentua tur e retonan cu nan tabata confronta. Tur esaki ta den e "Aruba SDG Report" cu lo wordo presenta na Nacionnan Uni.

E comision di SDG Aruba, cu a keda institui pa provee un direccion strategico y pa coordina e implementacion di e SDGs, a organisa diferente sesion pa envolve e comunidad pa identifica bon practicanan di organisacionnan local den implementacion di e metanan di Nacionnan Uni.

A captura y raporta varios iniciativa. Sinembargo tin mas iniciativa y oportunidadnan na Aruba cu por contribui den logra e SDGs. Riba e website nos ta comparti e storianan aki den un rapport mas elabora. E rapport di Reino lo wordo entrega na Nacionnan Uni den un forma digital cu un link na e website di SDG Aruba www.sdgaruba.com.

Pa esaki, nos ta pidi e sector educacional, organisacionnan y/of companianan pa entrega nan storia di loke nan ta haciendo pa contribui na logro di e metanan aki. Por bishita e website di SDG Aruba y yena e formulario di e storia con bo compania ta implementando e SDGs na Aruba. Nos ta desea di siña di bo.



WEGANAN ESCOLAR

INVITACION PRENSA

GRAN APERTURA

Diabierna 17 juni | 6:00 pm
Stadion Guillermo P. Trinidad

Bo(so) presencia ta altamente aprecia.

BAN APOYA NOS MUCHANAN!



Ministerio di Enseñansa y Deporte



Feliz diamars!

DESPUES DI TEMPONAN DIFICIL
CU NOS A PASA ADEN,
NUNCA NOS MESTER LUBIDA
E FORSA IMPRESIONANTE,
E RESILIENCIA Y SOLIDARIDAD
CU NOS A MUSTRA OTRO COMO
CIUDADANO, FAMIA Y
COMO PARTI DI E COMUNIDAD MUNDIAL.
HUNTO NOS MESTER ACTUA, INNOVA,
ADAPTA Y AVANSA Y
RECONSTRUI NOS PAIS.



**20
22** | AÑA DI
INVERSION Y
OPORTUNIDAD